

中

論

中論序

余始見館閣及世所有徐幹中論二十篇，以謂盡於此。及觀貞觀政要，怪太宗稱：『嘗見幹中論復三年喪篇。』而今書此篇闕。因考之魏志，見文帝稱：『幹著中論二十餘篇。』於是知館閣及世所有幹中論二十篇者，非全書也。

幹字偉長，北海人，生於漢魏之間。魏文帝稱幹懷文抱質，恬淡寡慾，有箕山之志。而先賢行狀，亦稱幹篤行體道，不耽世榮。魏太祖特旌命之，辭疾不就。後以爲上艾長，又以疾不行。蓋漢承周衰及秦滅學之餘，百氏雜家，與聖人之並傳，學者罕能獨觀於道德之要，而不牽於俗儒之說；至於治心養性去

就語默之際，能不悖於理者固希矣，況至於魏之濁世哉？幹獨能考六藝，推仲尼孟軻之旨，述而論之。求其辭，時若有小失者；要其歸，不合於道者少矣。其所得於內者，又能信而充之，逡巡濁世，有去就顯晦之大節。余始讀其書，察其意，而賢之。因其書，以求其爲人，又知其行之可賢也；惜其有補於世，而識之者少。蓋迹其言行之所至，而以世俗之好惡觀之，彼惡足以知其意哉？顧余之力，豈足以重其書，使學者尊而信之？因校其脫繆，而序其大略，蓋所致余之意云。曾鞏序。

中論後序

夫文者，言之華也，以明利害爲本；行者，德之輝也，以達行藏爲要。不明利害，不達行藏，文行雖美，無足以全身。是故文勝行，則盈言而虧德，而行藏無以達；行勝文，則盈德而虧言，而利害無以明。故此二者，均有偏短在焉，不得謂之中庸之道也。夫所謂中庸之道者何？曰，文而行，行而文，則明利害者達行藏，達行藏者明利害；二者常相須而行，然後戕身之禍可以免。故文行並兼之士，其不可稱爲彬彬君子者，吾不之信也。

徐偉長者，生於漢魏濁世，耿介不拔之士也。其文博而正，其行清而純。

就其文，可以明其言之正；考其行，可以達其德之純。言正德純，故其文行能法於後世而無窮，此非彬彬君子而何？惟其有此名也，故能鴻毛榮利，而泰山名節。由此觀之，則其氣節之高，遠非常人所可比。

夫漢魏濁世，人心奸詐，道德違微，雖出仕者欲行其道於天下，然往往理實相反，欲求其榮者，適足以增其辱耳。故孔子曰：『邦無道，富且貴焉，恥也。』偉長能深寤此旨，堅立其志，不仕僞朝，雖魏太祖再三旌命，仍辭疾不就。其所以能如此者，非以明達利害行藏，而欲獨全其身耶？故不明利害不達行藏之士，每因其才而不能保其身；此所以德祖見誅，而正平被戮也！於戲！如偉長者，真可謂明哲保身之士矣。

余於點閱此書後，景仰偉長之爲人。心不能已，故就其文行大較言之，以

作此書之後序。

民國十五年七月，浦江黃素寒山氏識。

中
論
後
序

三

標點用法說明

一。表一句之收束。

例：有數無類。（論語衛靈公）

二，表一頓或一讀。

例：鳥有翮者，重首而屈尾，將欲飲於河，則必顧，乃銜其羽而飲之。（韓非子說林下）

三；表含數小讀之長讀。

例：中也養不中，才也養不才，故人樂有賢父兄也；如中也養不中，才也養不才，則賢不肖之相去，其間不能以寸。（孟子離婁下）

又：古之善守者，以其所重，禁其所輕；以其所難，止其所易。（韓非子守道）

又：上好禮，則民莫敢不敬；上好義，則民莫敢不服；上好信，則民莫敢不用情。

（論語子路）

又：周公及武公娶于薛，孝惠娶于商，自桓以下娶于齊，此禮也則有；若以妾爲夫人，則固無其禮也。（左傳哀廿四年）

又：君子居其位，則思死其君；未得位，則思修其辭，以明其道；我將以明道也，非以爲直而加人也。（韓愈諍臣論）

四：（甲）冒下文。

例：粥子曰：「欲剛必以柔守之，欲彊必以弱保之。」（列子黃帝）

又：凡爲天下國家有九經：曰，修身也，尊賢也，親親也，敬大臣也，體羣臣也，子庶民

也，來百工也，柔遠人也。（禮中庸）

（乙）總上文。

例：符表正，故情性治；情性治，故仁義存；仁義存，故盛德著；盛德著，故可以爲法象；斯謂之君子矣。（中論法象）

又：所惡于上，毋以使下；所惡于下，毋以事上；所惡于前，毋以先後；所惡于後，毋以從前；所惡于右，毋以交于左；所惡于左，毋以交于右：此之謂絜矩之道。（禮大學）

五？表疑問。

例：古之至人，先存諸己，而後存諸人；所存於己者未定，何暇至於暴人之所行？

（莊子人間世）

又：彼丈夫也，我丈夫也，吾何畏彼哉？（孟子滕文公上）

又：如欲平治天下，當今之世，舍我其誰也？（孟子公孫丑下）

六！（甲）表贊歎。

例：君子哉！漆雕氏之子！其言人之美也，隱而顯；其言人之過也，微而著。（家語好生）

（乙）表悲歎。

例：命矣夫！斯人也，而有斯疾也！斯人也，而有斯疾也！（論語雍也）

（丙）表快樂。

例：快哉！此風寡人所與庶人共者耶？（蘇轍黃州快哉亭記）

（丁）表景慕。

例：高山仰止！景行行止！（詩車鄰）

（戊）表願望。

例：執事名滿天下，而位不過五品；其容色溫然而不怒，其文章寬厚敦朴，而無怨言，必有

樂乎斯道也。賦顧與聞焉！

(己)表勸勉。

例：懷抱利器，鬱鬱適窮土，吾知其必有合也。董生勉乎哉！(韓愈送董邵南序)

(庚)表禁止。

例：毋！以與爾鄰里鄉黨乎！(論語雍也)

(辛)表命令。

例：小子聽之！清斯濯纓，濁斯濯足矣；自取之也。(孟子離婁上)

(壬)表應諾。

例：孔子曰：「諾！吾將仕矣。」(論語陽貨)

(癸)表招呼。

例：參乎！吾道一以貫之。(論語里仁)

(子)表驚異。

例：異哉！初淅瀝以瀟瀟，忽奔騰而砰湃。(歐陽修秋聲賦)

(丑)表諷責

例：噫，噫然，小人哉！(論語子路)

又：子何知之晚也！夫造化之變，可知而不可鄰，可聞而不可親；雖欲假子之道，其何以

至？(元真子碧虛)

七『』表引用詞句之起迄。

例：陳大夫曰：『吾國亦有聖人，子弗知乎？』(列子仲尼)

八「」表提出引句之起迄。

例：諸子之書，稱「爵祿非貴也，資財非富也」，何謂乎？（中論爵祿）

九「『』」表引句中之引句之起迄。

例：或曰：『然則仲尼曰，「未知，焉得仁？」乃高仁耶？何謂也？』（中論智行）

十「」表人名，地名，及朝代名。

例：孔子，顏淵。（人名）莒，鄭。（地名）唐，宋。（朝代名）

十一「」表書名與篇名。

例：論語，莊子。（書名）原道，逍遙遊。（篇名）

十二「……」表刪略語句，及未盡之詞。

例：大學之道，……在止於至善。（刪略句）

中 論 標點用法說明

又：以酒，肉，菜，蛋，……之類宴客。（未盡之詞）

中論目錄

治學	一
法象	五
修本	九
虛道	十五
貴驗	十九
貴言	廿三
藝紀	廿七
覈辨	三〇
智行	三三

爵祿·····	三七
考僞·····	四一
譴交·····	四八
歷數·····	五四
天壽·····	五七
粉本·····	六三
審大臣·····	六七
慎所從·····	七二
亡國·····	七六
賞罰·····	八二
民數·····	八三

治學第一

昔之君子，成德立行，身沒而名不朽，其故何哉？學也。學也者，所以疏神達思，怡情理性，聖人之上務也。民之初載，其矇未知，譬如寶在玄室，有所求而不見，白日照焉，則羣物斯辨矣。學者，心之白日也。故先王立教官，掌教國子，教以六德，曰：智，仁，聖，義，中，和；教以六行，曰：孝，友，睦，婣，任，恤；教以六藝，曰：禮，樂，射，御，書，數。三教備，而人道畢矣。學，猶飾也。器不飾，則無以爲美觀；人不學，則無以有懿德。有懿德，故可以經人倫；爲美觀，故可以供神明。故書曰：『若作梓材，既勤樸